

欽定大清會典事例

欽定大清會典事例卷六百十五

兵部

緣營處分例

參劾

營私

患病

參劾○順治年間定武職各官經上司糾參之後乃將上司列款許首者將許首之事不准行仍照例處分○康熙十一年議准武職大員將曾經奉

旨永不敘用之人私用為官者革職至參官有不書名者將揭報具題官各罰俸六月○四十二年覆准內外武職大員如有廉能屬官屈為貪劣

題參審明涉虛將原誣揭官降二級調用具題
官降一級調用。○又題准提督貪婪總督不據
實參奏總兵官貪婪提督不據實參奏發覺審
實之日無論同城不同城皆降三級調用。○又
覆准直省武職該管上司將屬官經管事務並
在任月日錯誤開報以致本官革職者將開報
上司降二級調用督撫提鎮降一級留任降級
者將開報上司降一級調用督撫提鎮罰俸一
年罰俸者將開報上司罰俸六月督撫提鎮罰
俸三月如將不應參之官開報誤參未經處分

經查出改正。係革職降調。將開報上司罰俸一年。督撫提鎮罰俸六月。係虛革虛降。住俸罰俸者。將開報上司罰俸六月。督撫提鎮罰俸三月。

○雍正五年

諭官員先參婪贓革職提問者。原因婪贓被參。故革職以便審訊。如審無婪贓。其罪不至於革職。自應准其開復。儻因已經革職。遂謂毋庸議。未免冤抑。嗣後凡被參革職。訊問之員。審係無罪者。皆著以開復定擬。不得稱已經革職。毋庸議。將此永為定例。○又覆准在籍武舉。並候選衛所千總等微員。有把持公

務武斷鄉曲一切犯法之事例應革職審問者該督撫咨部斤革彙題如審係無辜咨部彙題開復若在籍微員有犯法之事不行懲治將地方官照徇庇劣員例議處至該微員本無劣迹而地方官挾嫌捏款揭報者將地方官照捏報劣員例議處○六年議准直省副將參將至千總把總貪婪該管官不據實詳揭經督撫提鎮題參審實之日係知情者無論同城不同城將親標該管官降三級調用統轄官降二級調用失察者同城之親標該管官降一級留任統轄

官罰俸一年不同城在百里以內者親標該管
官罰俸一年統轄官罰俸九月百里以外者親
標該管官罰俸九月統轄官罰俸六月在京巡
捕營不詳揭屬官貪婪者照此例行及衛所各
官不詳揭屬官貪劣者亦照此例行如統轄官
將貪劣屬官申報督撫提鎮該管官未經詳揭
或該管官申報統轄官統轄官不申報督撫提
鎮或該管官申報督撫提鎮竟不申報統轄官
者亦照此例分別議處其不同城各官於疏內
將里數聲明以憑查議儻里數聲明失實將轉

詳官照徇情例議處。至貪婪之處。該管上司正
在訪查。而督撫提鎮先已發覺。即行詳揭者。該
管上司止照失察例議處。再題參貪劣屬員。不
將未經詳揭之該管各官附參者。罰俸一年。署
印官不詳揭貪劣屬官者。如任事不及一月。免
議一月以上。與實授官一例議處。至科道糾參
貪劣官款蹟審實之日。將不詳揭之該管統轄
各官分別議處。不題參之督撫提鎮。皆照統轄
官議處。○又議准督撫提鎮等。聞有貪劣屬員。
行令該管官訪查。該管官不即速申覆。或洩漏

風聲以致貪劣官自盡潛逃者將該管官罰俸一年其自盡者如有威逼致死情由審實有確據者將威逼之官革職提問至屬員互相訐告該管官不行詳報及經督撫提鎮知覺行令訪查又復詳報遲誤或督撫提鎮訪查屬員優劣該管官不即速申覆者罰俸一年若該管官未奉督撫提鎮明文即將屬員拘拏羈禁者革職

○十年奉

旨向來大計叅劾官員除貪酷發審外其餘著送部引見嗣後特叅文武官員比照大計之例如浮躁不及

等款者亦著送部引見永著為例。○乾隆二十四年諭封疆大臣表率屬員其責綦重儻於平日意所不愜者或因事捏構重款登諸白簡以冀聳聽即審屬全虛而其人去官涉訟經年沈滯已抱不白之冤在原叅者轉得以風聞未確立身無過之地可乎且即事經昭雪例當復職而上官又或拘牽斥駁無可控訴其情尤屬可憫嗣後各省督撫等叅劾屬員務在虛公持正悉心體訪固不得姑息示恩亦豈容挾嫌誣奏儻有所叅重款一加審訊全屬子虛者將原叅之人作何議處至審案已結該員例得開復而督撫不

為題請應准本人赴部告理如所控不實即治以虛捏之罪若承審之員或因原叅已經去任有意為之開脫或迴護原叅及擄捨一二輕款以實之亦應分別議處以示懲創其如何詳悉定例之處著該部妥議具奏欽此遵

旨議定總兵等叅奏屬員革職審訊承審官審明所叅重款全屬虛誣者若係該管大臣挾嫌誣報將誣報大臣等革職提問至審案已結事經昭雪將被叅之員於本案聲明准其開復儻拘牽斥駁不為題請經本人赴部告理查覈得實除將

本人照例題請開復外將不行題請之官照偏袒不公例降二級調用係承審官不詳請開復者亦照此例降二級調用如所控虛捏不實將本人交刑部照例治罪其或承審之員因原參之大臣已經去任有意審虛使參員幸圖開復照故出例革職或係原參重罪全屬虛妄承審官迴護原參大臣不行審雪有心鍛鍊照故入例革職並有重款雖已審虛搆捨一二輕款以實之代原參掩飾者照徇情例降二級調用其被參革職發審之員本案審係全虛者俱聲明

奏請開復不得稱已經革職毋庸議完結如革職發審之員先經另案降革者本案審虛止將審虛之案開復其從前降革之案不得概予開復其先經另案革職留任降級留任者本案審虛亦止將審虛之案開復補官之日仍將從前降革留任之案帶於新任至原叅重罪審虛而該員尚有輕罪應降級罰俸者該總督巡撫將該員原叅革職之案隨本聲請開復按其所犯輕罪應降級者降級應罰俸者罰俸原任內所有加級紀錄等項應抵銷者仍准抵銷武職官

員因公緣事降革後。或留於地方效力。及案犯未獲留緝人員。續立功績。並緝獲本案之犯。總督巡撫覈其功過。相抵請

旨開復者。千總以上官員。均令該督撫出具考語。給咨赴部引

見其引

見時。或發往該省以原官用。或留部選用。千總可否發回原省以千總補用之處。俱於摺內聲明。恭候

欽定。把總外委微員。應請開復之案。兵部覈與定例

相符者題請開復毋庸送部引

見○三十五年奏准提督總兵等官若屬員有虧空錢糧及盜案繁多營務廢弛者該科道於年底查實題叅將提督總兵降三級調用○又奏准該管上司將所屬官員經管事件並月日不行查明錯開揭叅以致本官革職者查係無心致錯將申報之上司降一級調用轉詳官降一級留任督撫提鎮罰俸一年降級調用者將申報之上司降一級留任轉詳官罰俸一年督撫提鎮罰俸六月罰俸者將申報之上司罰俸六月

轉詳官罰俸三月。督撫提鎮免議。其本官原議革職降調罰俸處分均予開復。如將不應參之官誤行題參未經處分經部查出係實降實革者將誤報之上司罰俸一年。轉詳官罰俸六月。督撫提鎮罰俸三月。係降革留任住俸罰俸者將誤報之上司罰俸六月。轉詳官罰俸三月。督撫提鎮免議。○又奏准凡有委員駐紮地方經督撫題准該員仍戀居城邑不即移往駐紮者照規避例革職該管地方官聽其規避不即行詳報及督撫提鎮司道等官不行揭參別經發

覺將該管武職地方官降二級調用。兼轄官降一級調用。督撫提鎮降一級留任。如該管官及兼轄官已經揭報。而督撫提鎮不行題參者。將督撫提鎮降一級調用。其揭報之官俱免議。如該管兼轄等官不行揭報。經督撫提鎮糾參。將該管地方官降三級調用。兼轄等官降二級調用。督撫提鎮免議。○嘉慶六年奏准。地方遇有失察等案。該管官先已奉差公出。及調署交卸離營。或非本任所轄。上司不加詳查。率行開參。經部題明處分。本員降革離任之後。復行申明。

更正者。除將本員開復外。將不行申明錯報之
上司降一級調用。轉詳官降一級留任。督撫提
鎮罰俸一年。若本員係降革留任者。除開復外。
將錯報之上司降一級留任。轉詳官罰俸一年。
督撫提鎮罰俸六月。○又奏准。官員互相訐告。
該管各官不行申報。及經督撫提鎮訪問行查。
又遲誤不速行查報者。均降一級留任。或屬員
貪劣。督撫提鎮密行查訪之時。洩漏風聲。以致
本員自盡脫逃者。均降一級調用。○八年

諭。嗣後除特旨交部嚴議之案。仍加等叢議外。其各省

參劾屬員。如有情節本輕而上司遽請嚴議。或情節較重。僅請議處者。著該部即將奏請處分未協之原參督撫等。隨摺聲明候朕定奪。○又議定。官員應得處分。該督撫提鎮照例分別題咨參奏。不准用嚴加議處字樣。如有情節本輕而遽請嚴議者。除將所參之員照例議處外。仍將原參未協之大臣。隨摺參奏。若奉

旨將原參大臣交部議處者。照誤揭屬員經部查出。未經處分例。分別議處。○二十二年

諭。蔣攸銛奏廣東雷瓊鎮總兵洪鼈年力就衰。請旨勒

休一摺國家簡用督撫大吏統轄文武所屬官員如有年力衰頹才不稱職者俱當留心查察據實糾參嘉慶二十年曾經降旨通飭茲蔣攸銛於雷瓊鎮總兵洪鼐衰老無能即行參奏雷瓊距省城較遠該督尚能留心體察不肯姑容較之衡齡與藩司習振翎近在同城乃於該藩司老病昏庸有心徇庇匿不奏聞二人相提並論其公私明闇豈不大相懸殊嗣後各督撫於所屬文武官吏務當認真考察而於藩臬提鎮大員尤當秉公查覈不可瞻徇情面聽其貽誤地方雷瓊鎮總兵洪鼐著即勒令休致○咸豐三年

諭向榮奏參違抗軍令之將官請先斥革一摺湖南九
溪營遊擊儘先副將鄭魁士帶領兵船隨同勦賊經
該大臣持令往催竟不遵行自應立正軍法據向榮
奏稱該員平素尚屬勇往為將備中得力之員著暫
從寬典先行革職責令戴罪立功作為前隊以觀後
效如再稍有玩誤即於軍前正法此後軍營帶兵將
弁儻有仍蹈疲玩畏憚惡習不遵調度貽誤軍機者
該大臣等於查明後如係提鎮大員即奏聞請旨正
法其副將以下各官即著一面正法一面奏聞毋庸
先行請旨以肅軍律○八年

諭張芾奏已革遊擊縱兵擾民。統兵大員袒護保留各等語。據稱已革遊擊楊國正。在江山一帶搶掠鋪戶。姦擄婦女。與團丁互鬪。以致縣城失事。明安泰路出龍游。兵多淫掠。周天受兵過湯溪。占房焚屋。金華鄉團以兵勇奪牛。赴營具控。周天受輒行捕殺數十人。指為通賊。並欲將楊國正保留錄用等語。楊國正先經晏端書以帶兵退避。參奏並未將其擾民激變之處聲敘。迨經奉有諭旨革職。拏問何以任其逗遛。軍營到處騷擾。龍游湯溪距省較近。晏端書豈無聞見。何以不聞參劾。總由平日意存見好。以致帶兵將領

任聽兵勇擾害地方。毫無顧忌。著晏端書仍遵前旨。即行提省嚴審。並將縱兵殃民各情。一併嚴切根究。此等滋事兵勇。該撫一有所聞。即當嚴飭將弁正法。數人。以儆其餘。如有袒護之員。即行從嚴參劾。自然畏法斂迹。亦不致相率效尤。嗣後該撫如聞各營再有不遵軍律。騷擾鄉民者。即派大員持令前往。會同帶兵之員。將滋事兵勇。以軍法從事。毋得一味姑容。自干重咎。○同治元年

諭吏部等部奏稱武職官員向歸督撫提鎮分別管轄。毋庸再由地方官兼轄。惟千總把總以下等官。恃非

地方官管。有任意妄為情事。請飭下各督撫嚴飭地方官。剔除弊端。各等語。營汛與郡縣並設。所以保衛地方。自應相助為理。乃近來營規日壞。於應行派兵巡緝守護等事。漫不關心。遇事袒護。與文員齟齬。種種弊端。於營制殊有關係。亟應大加整頓。著照該部所議。嗣後文員關會營員調兵防勦。儻敢遷延推諉。著該督撫即行嚴叅。兵丁不法滋事。經地方官關會。或武職各官袒庇。或奉行不力。照失察容隱例叅處。監獄城池營汛。不派兵協守。遇有緩急。不隨地方官同行。均准地方官據實稟揭。至搶劫重案。州縣會

營緝拏往往營弁並未獲案捏報協同著各督撫飭令各州縣於月終將營汛有無獲案詳報備查如互相捏報均照贍徇例叅處以昭平允

營私○康熙二十三年議准武職各官因事賈緣餽送禮物與者受者皆革職提問如餽送雖未收受並未出首後經發覺將不出首官罰俸一年○又議准武職各官有將任所民人買為奴僕者降二級調用縱容家人私買及委託營兵代買者亦照此例議處失察之該管官降一級留任○又題准武職現任官員聽任親友招

搖撞騙者革職。○三十八年議准武職進京引見藉端科斂所屬官兵以充私橐者革職提問該督撫提鎮不查叅者照不揭報劣員例議處。○雍正十一年議准武職因公科斂不入己者為首降一級調用為從罰俸一年該管官不揭報者罰俸九月。○乾隆五年奏准武職家人犯贓本官失察者降一級調用。○六年奏准在官兵役指稱公事犯贓該管官知情者革職失察贓至十兩以上者降一級留任十兩以下者罰俸一年。○又奏准武職各官所用食物工料將價值

給發遲延者。罰俸一年。半給。半不給者。降二級。調用全不給發者。革職。所欠價值。照數追還。○二十五。年。奏准。官員。值軍政之年。有藉端。斂派者。革職。提問。若都司。守備等官。斂派。該管副將。參將。遊擊等知。而隱匿。不行揭報者。革職。如已。經揭報。該提督。總兵。不行題參者。將提督。總兵。降五級。調用。○又。奏准。官員。失察。親友。在外。招搖。撞騙者。降一級。調用。○又。奏准。武職。人員。假借。公事。挾制。官府。及將。曖昧。不明。姦賊。情事。汗人名節。報復。私讎者。革職。分別。治罪。○三十八

年覆准。外省官員隨任子弟。僮任信子弟。聽其
藉辦公事。與人接見。致有營私滋弊等事。干涉
本官者。革職治罪。雖未營私滋弊。而聽其與人
接見。出入無忌者。降一級調用。該管上司明知
屬員信用子弟。以致營私滋弊。不行查參者。降
三級調用。若僅止失察者。降一級留任。兼轄上
司。罰俸一年。○四十五年奏准。督撫衙門需用
物件。俱給價平買。不得交中軍購辦。違者照違
制律。革職。中軍照溺職例。革職。其有勒令屬員買送
物件。及短發價值者。俱革職治罪。各省提督總

兵以下各員。如有交所屬員弁買辦物件者。均照此例辦理。○四十九年奏准武職提督總兵等官。如有收受屬員門包押席銀兩。並令屬員承直筵席者。均革職治罪。○嘉慶六年奏准武職提督總兵等官。如有縱容家人收受屬員門包者。革職。失察者降一級調用。○十二年議定武職將備巡查營汛。如有藉端需索。經該督撫提鎮據實糾參。照因公科斂入己律。革職計贓治罪。○二十四年

諭御史黃中模奏請禁外省武職濫役兵丁。並攤扣月

餉一摺直省武職衙門不准私役兵丁節經降旨飭
禁其各營月支兵餉為該兵等養贍身家亦不得藉
端攤扣惟恐日久懈弛仍蹈故習著各督撫提鎮等
通飭所屬員弁申明例禁如有輒將在伍兵丁濫行
役使及藉口營中公用攤扣月餉以致兵丁苦累不
能盡心操練者即行據實查叅以肅戎政○道光十

五年

諭嗣後回城伯克外藩夷使及蒙古王公台吉等如有
違例候問及投贈等事該大臣等務即申明禁例力
斥其非概行辭卻以杜請託夤緣之弊儻不能破除

情面違例收受。一經發覺。定將該大臣等從重治罪。決不寬貸。○咸豐三年。奏准武職官員因事倩人屬託。及代人請託者。事發均革職。該上司不立時揭參。降三級調用。○七年。奏准營員於該上司信任之人。交接餽送。不知違嫌者。降三級調用。

○同治元年

諭御史孟傳金奏各省兵差騷擾。請申明定例。嚴實辦理。一摺。國家命將出師。原冀拯民水火。而貪官汙吏。反藉以苛斂分肥。雖民間控告頻仍。而同官代為開脫。大吏曲為優容。習染相沿。病民實甚。夫軍需供應。

定例本屬詳明。地方有司。何難詳稽例案。妥為遵辦。乃開銷之浮冒。則必託例而行。而供億之疲繁。則多違例而取。該員等芻牧攸司。清夜捫心。其何以仰副朝廷愛民之意耶。著各直省督撫嚴諭所屬嗣後。凡遇兵差過境。務須遵照定例辦理。不准絲毫擾累。如有縱容書役。妄拏平民車馬。指官勒索。藉端苛派等弊。一經發覺。即將該官役等嚴叅治罪。並將徇隱之上司議處。決不寬貸。至帶兵官弁。尤應恪遵疊次諭旨。嚴明約束。經過地方。不得秋毫騷擾。儻敢不遵紀律。或橫行街市。欺侮商民。或揭案鬧堂。需索規費。有

一於此即著帶兵大員查明叅奏。按照軍法從事。以肅戎行。○三年

諭前因李鴻章奏參將孫家烺訛詐降衆馬文彪銀兩。並摻搶難民江義和財物。指勒使女等情。當經降旨。將孫家烺革職。交該撫從嚴訊辦。茲據該撫奏稱。查明孫家烺嚇詐馬文彪銀兩。後旋即呈繳給回。其摻搶江義和財物一節。係誤聽章慶昌訛傳。即將江義和並伊妻江汪氏及使女等拏回。審問。摻出洋錢七圓。分賞親兵。旋因江義和訊不承認。遂送交善後局審辦。先將江汪氏等分別釋回。各等語。孫家烺本有

查拏姦細之責。乃誤聽人言。輒將江義和獲解。雖查無摻搶指勒各情。而辦理實多草率。其嚇詐馬文彪銀兩。雖即給還。究屬貪鄙無恥。孫家煊著發往黑龍江充當苦差。○光緒六年

諭何璟奏特參私役練兵之署任總兵。請旨革職。一摺。各省設立練營。原期一兵得一兵之用。豈容將弁隱占私役。致誤操防。署福建甯鎮總兵唐寅清。清私派練兵前往湖南。久未歸伍。署內夫役冒占兵額。實屬有干軍政。僅予革職。不足示懲。唐寅清著革職。永不敘用。

患病。乾隆二十五年奏准提鎮一時患病年力未衰。平日居官素優。該督撫於本內聲明請旨解任。留於原任省分調治。副將以下營衛守備以上一時患病年力未衰。平日居官尚好。該將軍督撫提鎮委員確驗。出具切實印結。由該將領覆驗加結。題咨解任。遊擊以下准其回籍調理。其副將參將應否回籍之處。聲明請

旨。營千總把總告病之時。如有居官好人材尚可驅使者。該將軍督撫提鎮確查。委員親驗。取具委員及專管官印結。並居官漢仗如何之處。於咨

呈文內聲明解任回籍調理均俟病痊日補用。如提督總兵告病不實本官降二級調用代題督撫降一級留任。至副將以下等官告病不實本官及驗看出結官俱革職加結上司降三級調用。轉報之提督總兵降二級留任。具題出咨之督撫降一級留任。營千總把總告病不實將本官驗看出結官及加結轉報具題出咨各上司均照副將以下告病不實例分別議處。○三十七年奏准現任官員病故該管官稽遲不報及員缺不行申報者均罰俸一年。若現任官員

潛逃該管官不行申報降二級調用○四十五年

諭嗣後吏兵二部於文武員弁在部具呈告病者查明該省如係緊要事務顯有託故規避情節即行具摺參奏不必行查該督撫○嘉慶六年奏准提督總兵患病請假該督撫照例聲明請

旨准其解任或回籍或在原任省分調理副將以下守備以上題請解任營衛千總把總各請解任均聲明病痊尚堪起用字樣准其回籍調理其試用候補官照現任官例若甫經授職尚未到

任及分發揀選官員。如在京及中途患病不能赴任赴省者。在京報明司坊官。在外報明地方官。照例驗看出結報部。准其回籍調理。以上各官均俟病痊之日。照例辦理。至旗員補放綠營。如有患病情事。均照此例行。○又奏准現任官員赴部引

見及因公抵京並已經引

見人員未及起程。如有患病情事。即在本城正指揮處具呈。該指揮即親往詳加驗看。出具切實印結申部。告假在三月以內者。均准其給假調養。

假滿痊愈之日。即行起程。報部查覈。如告病假。限已逾三月不痊者。司坊官再覆加查驗。果係患病屬實。再行出具印結。申送該城察院轉咨兵部五品以上。具題開缺。准其回籍調理。如病痊之日。可否起用之處。令原籍督撫驗看報部。照例具題送部引。

見以原缺補用。○九年

論各省武職大員。有營伍地方之責。衰病人員。豈能臥理。上官多一日姑容。公事即多一日廢弛。前經疊降諭旨。令各查明具奏。若因此等老病人員。內有從前

曾經出力者亦何妨據實陳明朕自當酌量施恩或
令在京當差俾資祿養總不應聽其貪戀外任以致
誤公即如前此將軍張承勳提督珠隆阿總兵孝順
阿均經朕訪聞老疾諭令來京迨到京以後果係龍
鍾衰病可見各省似此者必有若必俟朕一一訪察
則安用封疆大吏為耶嗣後各宜秉公查察如屬員
內有實在老病者即行分別奏劾不得仍前徇庇市
私恩而廢公義儻經此次飭諭之後再不據實陳告
將來該員等遇有陛見及引見來京經朕看出衰老
必將該督撫提鎮等治以容隱之罪○十二年議定

世職官員患病該督撫委員確驗酌量給以假期總不得過六箇月之限如六箇月仍未痊愈將俸祿停止俟病痊當差之日起支俸如停俸至一年之後調養未愈不能當差令該督撫查驗實在情形如果殘廢即行開缺將應襲之人另請承襲如無應襲之人該督撫查明咨部辦理○二十年

諭先福奏審明已革守備單懷義規避屯防毀罵總兵一案請將該革員先在省城枷號一箇月滿日發往伊犁等語此案已革守備單懷義因派往新疆屯防

輒敢捏病規避。又不赴省驗看。復因向總兵常祿借貸不遂。肆行謗詈。種種刁狡情節。甚為可惡。單懷義著先在省城枷號兩箇月。滿日折責四十板。再行發往伊犁效力贖罪。至該省營員。遇派往新疆屯防。往往捏病規避。著照該督所議。嗣後派定換防人員。如有告病者。查驗明確。准其改派。仍將該員存記。下屆補派換防。若託病規避。即照此案參辦。其在屯防處所當差勤慎。班滿之日。由該管將軍都統大臣咨明總督。撤回本營。准其挨次酌量升用。分別勸懲。以肅

軍紀。○二十五年

論御史佟濟奏請嚴禁督撫勒令屬員告病一摺所奏是各省督撫表率屬吏舉劾皆當一秉至公使人知所勸懲若如該御史所奏督撫授意屬員勒令告病外示寬容使其暫行離任至該劣員再出服官貽誤地方均所不計豈實心任事之道嗣後各督撫於所屬文武職官有劣迹顯著及才不勝任者著俱據實劾參甄別或改教降補或用京職分別覈辦除實係患病之員仍照例取結奏咨外其餘概不許勒令告病以杜虛偽其現在告病之江蘇試用同知聯璧著該旗於到京日驗明是否屬實據實具奏○道光二

年

諭瑪呢巴達喇等轉奏藍翎侍衛蘇爾慎染患痰疾。不能在侍衛上行走。懇將藍翎侍衛開缺調養等語。蘇爾慎去年獲罪甚重。今伊患病。懇將侍衛開缺理應斥革。但蘇爾慎前在軍營屢次效力。曾蒙

特賞巴圖魯名號。著賞給二等侍衛。即以原品休致。令回原旗調養。其應如何給俸之處。著兵部照例辦理。

○二十六年

諭布彥奉奏請將勒番不力。具稟告病之總兵交部嚴議一摺。所參甚是。西甯鎮總兵站任。前經該督派往

黑錯寺督勦番匪。該總兵並不認真攻勦。輒私遣人
先往關說。並以千總楊正才等赴寺作質。換其頭目
來營一見。即謂為悔懼投誠。辦理已屬顛預。迨番族
獻賊寥寥。該總兵轉置主謀糾黨之兇徒於不問。僅
將弱小之那沙滅力迭二莊攻打。即請撤兵歸伍。顯
蹈從前將就了事。惡習怯懦無能。可恨之至。現因達
洪阿等勦焚莊寺。大振軍威。該總兵輒行告病。希免
叅劾。實屬辜恩溺職。站住毋庸交部嚴議。著即革職。
發往烏魯木齊效力贖罪。以示懲儆。○二十七年

諭。李星沅奏請將巡洋不力之總兵革任留緝一摺。江

南蘇松鎮總兵林明瑞於海洋劫掠多案。既不能先
事豫防。迨經降頂革留。仍復不知愧奮。以致舊案既
多未獲。新案又復頻仍。輒敢稱疾回署。並不竭力督
拏。當此捕務喫緊之時。即革任留緝。亦不足以資驅
策。林明瑞著即行革任。飭令回籍。○二十八年

諭。徐廣縉奏副將患病開缺。請旨簡放一摺。廣東南雄
協副將員缺。著兵部照例辦理。向來各省副將告病
告養。丁憂等項。缺出例由具題。請旨從無專摺請簡
之例。該副將馬鳳圖告病開缺。自應遵例覈辦。徐廣
縉不諳定例。率行具摺請旨。著傳旨嚴行申飭。○咸

豐二年

諭兵部奏請將八旗及各省駐防官員告休定例改歸
畫一等語定例綠營官員凡遇軍政之年不准告病
乞休八旗則例雖無專條向俱照綠營辦理惟各省
駐防多有臨考告休仍請食俸者辦理殊未畫一嗣
後各省駐防旗員均著與在京八旗按照綠營定例
如有於軍政之年告病乞休者即行勒令休致其出
兵受傷非在三處以上亦不得題請給俸以杜規避
而免歧異○又

諭朕因向榮久歷戎行才尚可用於道光三十年八月

特旨調任廣西該提督到任以來偶有戰功無不立
加優敘其官村古東兩次戰敗輒即稱病遷延久曠
職守朕以忠厚待人。不為逆億。僅予薄懲。旋復任提
督。賞還花翎。並念其保守省城勞績。開復革職留任
處分。加恩伊子向繼。雄以同知用。前據吳文鎔張亮
基。參其誇詐冒功飾智欺人。徐廣縉亦查其趨避過
明。非人是已。朕俱不為深究。該提督宜如何激發天
良。痛改積習。感朕棄瑕錄用之恩。力圖殺賊立功之
效。乃本日據徐廣縉參奏。向榮於六月二十七日先
已接印。至七月初六日奉到飭令任事之旨。竟稱病

難速痊。求該督奏請開缺。朕不料向榮喪心昧良。膽大藐玩。至於此極。國家用人。原期才能幹濟。即使功過不掩。亦不妨舍短取長。若向榮如此存心。殊出情理之外。現當粵楚軍務喫緊之際。文武員弁殫智竭力之時。而該提督從容觀望。竟欲置身局外。且可藉口於朝廷。不能用其才。統帥不能盡其力。若軍營相率效尤。兵驕將玩。更復何所懲戒耶。向榮著即革職。發往新疆效力贖罪。以為辜恩巧避者戒。○三年

諭。張亮基等奏查明已革湖北提督及參將下落等語。前因岳州失守。疊經降旨。諭令該督撫等查明已革

提督博勒恭武如何下落。迅速具奏。茲據該署督等奏稱。該革員自岳州潰逃後。帶兵徑回武昌。又棄軍私回漢川。復藉養病。輒回穀城。提督本署。今又欲前赴江南軍前報效。種種荒謬。實出情理之外。該革員以湖北提督大員。奉旨防守岳州。乃始則見賊先遁。繼復輟轉偷生。若不明正典刑。何以嚴申紀律。博勒恭武侯提解到省。著即處斬。毋庸再行請旨。○四年。奏准武職推選各官。遇有軍務省分。藉病延不赴任。即委驗屬實。仍照規避例革職。○五年題准內外武職各官。業經派定統帶征兵。始行告

病呈請解任。雖經委驗屬實。仍照規避例革職。如身兼世職一併革退。另襲。○同治元年

諭。曾國藩奏請將私行違颺之將領革職一摺。記名總兵副將陳由立。前因調赴河南軍營。經曾國藩奏留皖南軍營。該副將竟與記名總兵余大勝、鄭陽和等託病告假。並遣人潛誘哨弁相率颺去。現在鄭陽和在湖南本籍帶勇。陳由立亦奉鄭元善劄委赴湘募勇。該員等託故離營。並不具稟候批。輒敢任意違颺。別謀投效。實屬大干軍令。陳由立、余大勝、鄭陽和著一併革職。並著毛鴻賓撤去鄭陽和帶勇差使。查明

陳由立余大勝等現在何處。派員押送曾國藩軍營。其隨同陳由立等颺去之李殿華吳太龍德亮等各員。並著毛鴻賓一併查明。押送曾國藩軍營聽候酌辦。嗣後各路軍營。於外來投效將弁。非有統兵大員移咨文件。一概不准留營。以杜效尤。而肅軍律。

欽定大清會典事例卷六百十六

兵部

綠營處分例

限期

限期○順治初年定武職各官赴任違限一月以上者罰俸三月二月以上罰俸六月三月以上降一級調用四月以上降二級調用五月以上降三級調用半年以上革職不及一月者免

議

後改赴任違限三月以上降一級留任四月以上降一級調用五月以上降二級調用半年

一年以上降三級調用一年以上革職○康熙十一年題准凡

欽部事件督撫提鎮皆以文到日為始限四月具題

兼管二省之總督。所管隔省事件。限六月具題。福建之臺灣。廣東之瓊州。湖南廣西雲南貴州之苗疆。陝西之安西。四川之甯遠府。所屬州縣。各該督撫於正限之外。分別展限。該省提鎮亦照巡撫例展限。江南等處提督管兩省者。照總督例展限。至違限月日。皆專責督撫提鎮計月議處。不分坐屬官。若違限不及一月者。免議。違限一月者。罰俸三月。二月者。罰俸六月。三月者。罰俸九月。四五月者。罰俸一年。半年以上。降一級留任。一年以上。降二級留任。二年以上。降三

級調用。儻事屬繁重。限內難結者。承查承辦官。將情由申詳該督撫提鎮。題明展限。如將易結之事。遲延不結。或將難結情由。不申詳督撫提鎮。將屬官題參。或限內並違限不及一月者。將承查承辦官。罰俸三月。若事已完結。將屬官以遲延題參。違限不及一月者。督撫提鎮免議。屬官亦免議。若違限一月。承查承辦官。罰俸一年。督撫提鎮。仍計月處分。○又題准。提鎮新任及接署者。皆以受事之日扣限。若科場監試。按日扣算。展限不必具疏題請。其因公務在本省內。

經行者不准展限。○又議准副參以下各官推

補得缺之後無故不赴兵科畫憑違限一月以

上者罰俸一年。兩月以上者革職。如兩月以上

無故不赴部領劄者亦革職。後改違限兩月者
降一級調用。違限

兩月無故不赴部領劄
者亦降一級調用。○又議准武職裁汰復

職降調初授等官自原任處所及原籍地方起

文赴部投遞在京者限十五日直隸限兩月山

東山西河南限三月江南江西浙江湖廣陝西

限四月福建四川廣東廣西貴州限五月雲南

限六月如有違限者照赴任違限例議處。○又

議准營衛升任各官。於劄付限票到日。該督撫
提鎮委官署理。限兩月交代明白離任。如升任
官有經管未完錢糧盜案事件。署任官或新任
官。不於兩月內覈明呈報上司。或升任官遲延
不交。及署任新任官推諉不接者。各罰俸一年。
上司督催不力。罰俸六月。若已申報上司。該管
上司不即轉報。或於升任官劄票已到。不即委
官署理者。各罰俸六月。該管上司已經轉報。督
撫提鎮具題遲延者。亦罰俸六月。無未完錢糧
盜案。上司藉端勒索稽留者。將該上司降二級。

調用督撫提鎮降一級留任。署任新任官。如有勒索稽留。亦照此例議處。其升任官不候劄票。即行離任。或不與署任新任官交代明白。即赴新任者。將升任官降二級調用。至錢糧盜案。未經清楚。署任新任官。即聽升任官徑赴新任者。將署任新任官降一級調用。督撫提鎮罰俸一年。升任官有錢糧冊籍未清。捏稱完結。或假捏印結。申詳上司。或增改投遞者。均革職。升任官將冊籍等項。於未交代之前。或被兵丁字識燒毀棄擲藏匿者。降一級調用。兵丁字識有乘機

作弊。侵匿銀錢者。照失察衙役犯贓例議處。其解任裁汰降調各官。不候交代擅自離任。及署任新任官並督撫提鎮聽其離任者。亦照此例議處。○二十二年題准。兵馬錢糧冊結造報。皆有定限。必須詳慎覈對明白。若蒙混造報。故留疑竇。以致款項不符者。降一級調用。轉報官罰俸一年。提鎮罰俸六月。係提鎮覈叅者。將造報轉報官議處。若冊內數目或有舛錯遺漏者。造報官罰俸一年。轉報官及提鎮各罰俸六月。如冊係提鎮自造。有舛錯遺漏者。亦罰俸六月。至

造報轉報官將冊籍遲延不送經提鎮題參或限內並違限不及一月者罰俸三月違限一月者罰俸六月二月者罰俸九月三月者罰俸一年四五月者降一級留任六月以上者降二級調用一年以上者革職若冊結已經申送而提鎮不即題咨違限五月以下者照造報官例議處六月以上者降二級留任一年以上者降三級調用至造送尋常一應冊籍不關繫錢糧者若有舛錯遺漏罰俸三月轉報官罰俸一月如有遲延仍按月分議處○二十三年議准武職

衙門前官有侵欺挪移拖欠未清之項。接任之署任官新任官。於交代限期内。徇隱不報。至交代後始行查出者。不議前官。竟坐接任官名下。照例議處。如有侵挪拖欠等弊。接任官不受交代。通詳督撫提鎮及該上司。而督撫提鎮及上司不揭報題參。徇庇前官。逼勒接任官交代者。接任官即據實報部。將逼勒各官以徇庇例議處。接任官調補別省。○三十二年覆准福建之臺灣澎湖升任官。均令新舊交代。其直隸山東山西河南江西湖北湖南陝西甘肅等省升任

官。劄票到日。照部定期。速赴新任。所有營務
委官署理。不必新舊交代。江南。福建。浙江。四川。
廣東。廣西。雲南。貴州等省。升任官。如有人堪以
委署。該督撫提鎮。即行委署。不必留候交代。如
無可委署之人。仍留候新舊交代。將留候交代
違限緣由報部。如無故違限。照赴任違限例議
處。○四十五年。覆准提鎮有奉

旨調取來京者。行文該督撫計程定限。給咨赴部投
遞聽候引

見。仍將起程日期豫行報部。引

見後回任日期亦行報部。○雍正九年議准督撫提鎮覈叅武職交代遲延案件將遲延情由詳細確查如舊任希圖掩飾不於兩月內將任內錢糧等項造冊送交經督撫提鎮指叅將舊任官罰俸一年。接任官免議。舊任官遲至例限將屆始將冊籍造送。接任官又不上緊查覈以致遲延者。舊任官罰俸一年。接任官罰俸六月。舊任官已明白造冊交送而接任官推諉不接以致遲延者。接任官罰俸一年。舊任官免議。其督催不力之上司仍照例罰俸六月。○十二年議准

在京鑿儀衛漢鑿儀使及巡捕營各官領俸清冊。春季於上年十二月十五日以前。秋季於六月十五日以前。各造送到部。移咨戶部關支。其有降罰事故。由部於奉

旨後註冊。並知會戶部備案。領俸之時。該衙門將各官有無事故。造冊送部。由外任升調者。若有隨帶降罰之案。該員具呈該衙門。即於冊內註明。均交稽俸廳將各官降罰。並現在照何品級食俸之處。覈對確實。一併移送戶部。僮造冊遺漏舛錯。照例議處。○十三年議准武職各官赴任

如有中途旅店舟次患病難行及風水阻滯違限止一二月者該員呈報該省督撫提鎮咨報部科免其叅處若違限至三月以上果有阻滯實情取具該地方官印結申送部科免議如無地方官印結及並無事故藉端觀望遲延不赴新任並繞道歸里捏稱中途患病者皆按違限月日議處○乾隆元年奉

旨朕因各省提督總兵官未經識認者甚多是以降旨令其酌量先後來京陛見向來提鎮到京皆赴部投文聽候引見但此例不行已久督撫提鎮同為封疆

大吏督撫既不赴部引見。則提鎮到京亦准其即赴
宮門請安。候朕宣召。不必先行赴部。至起程赴京及
回任日期。仍照舊例報部。以便稽查。○三年議准。凡
通行督撫提鎮。按本地情形詳細查議事件。各
該督撫於四月六月正限之外。若事易結者展
限兩月。難結者展限四月。該督撫分別題咨。按
限完結。各省提鎮有總督統轄者。凡通行查議
事件。由總督彙覆。該提鎮毋庸別定限期。其無
總督統轄之提鎮。遇通行查議事件。照該省巡
撫易結難結之例。分別題咨。按限完結。如逾限

不結。皆照。

欽部事件。遲延例。分別議處。○六年奏准。在京革職。官曾經問有罪名者。限一月起程回籍。五城司坊官將起程日期報部。並知會原籍。儻不即起程。違限一月以上者。本人照例治罪。巡捕營專汛官。不於限內催令起程。容留一人者。降一級留任。二人者。降一級調用。三人者。降二級調用。四人者。降三級調用。五人者。降四級調用。六人以上者。革職。兼轄官。容留一二人者。罰俸一年。三四人者。降一級留任。五人以上者。降二級調

用十人以上者降四級調用步軍統領於所屬
巡捕營地方容留一二人者罰俸三月三四人
者罰俸六月五人以上者罰俸一年十人以上
者降一級留任。○又奏准武職各官有例應議
處之案奉該管上司行取職名該員開送遲延
者罰俸一年轉催官罰俸六月若屬官例應議
處並無應詢緣由該管上司揭報遲延者按限
期處分不得藉屬員開送遲延希圖推卸至行
取例應議處職名該管官不行開送經督撫提
鎮以徇庇附叅者降二級調用。○又奏准外任

革職官交代完日。即行起程。不得過五月之限。該督撫提鎮等將起程日期報部。並知會原籍。儻不即起程。違限一月以上者。本人照例治罪。專汎官不於限內催令起程。容留一人者。降一級留任。二人者。降一級調用。三人者。降二級調用。四人者。降三級調用。五人者。降四級調用。六人以上者。革職。兼轄官容留一二人者。罰俸一年。三四人者。降一級留任。五人以上者。降二級調用。十人以上者。降四級調用。提鎮所屬地方。容留一二人者。罰俸三月。三四人者。罰俸六月。

五人以上者。罰俸一年。十人以上者。降一級留任。其有冤抑欲赴都察院具呈申理者。地方官給咨來京。事竣發回原籍。如藉端留滯者。照例治罪。徇情容留之五城司坊官。交吏部議處。○又奏准漢侍衛及鑾儀衛行走之漢世爵等官請假回籍者。呈該管官酌定日期。具奏請

旨。其往返程途在京者限十五日。直隸限兩月。山東山西河南限三月。江南江西浙江湖廣陝甘限四月。福建四川廣東廣西貴州限五月。雲南限六月。除往返日期外。在家均許住四月。依限回

京如違限一年以上者。罰俸一年。二年以上者。休致。○十一年奏准。各省督撫提鎮奉到部文。務令按限完結題覆。咨覆之日。將准咨月日及有無遲逾。隨案聲明。若遺漏不聲明者。罰俸六月。○十四年奏准。豫行保舉及調取引。

見官回任。由部給予驗票。向未定有限期。此等官均有現任職守。如或逗遛日久。職任久懸於營伍地方。不免遺誤。嗣後豫保送部。以及奉

旨調取引

見仍回原任各官。發給驗票。照赴任限期填註。今依

限回任。將驗票申繳督撫提鎮查覈。將有無違限之處。聲明報部。如有違逾。照赴任違限例議處。至揀發各省補用者。亦照此例辦理。○十五年覆准。

欽部事件。承查承辦官。逾限不及一月完結者。比照逾限不及一月罰俸三月之例。酌減罰俸一月。○又覆准。辦理邊疆海疆苗疆省分事務。提鎮與督撫相同。所有限期應展不應展之處。照各督撫現定州縣按營汛坐落之地。分析聲明。至加展限期地方。不准再扣道里日期。○又議准。

各省提鎮有通行查議事件。係專行一營者。限四月完結。係通行各營易結者。限六月完結。難結者。加展兩月完結。至通行查議之事。有不需各營議詳。在本標將領可以覈定聲覆者。限兩月完結。如逾限不結。查照違限日期議處。至新任接署以及巡查營汛。均照例加展。○又奏准營汛各官。遇有承緝承修承造等項事件。均於初叅限滿之日。接扣二叅限期。不得以接到部覆之日始行起限。○又奏准承緝各項人犯。營汛各官。原有協同地方文職查緝之例。應照文

職盜案限四月。無名兇犯限六月。叛逆人犯將原定三年之限減去一年。限以二年。如限滿不獲。各照原例議處。○又奏准候選候補武職各官赴部投文違限。向照赴任違限例議處。但赴任者皆係已經得官之人。恐其逗遛規避。貽誤地方。是以定例綦嚴。至候補候選與已經得官者不同。未便概照赴任例議處。嗣後投文違限無故遲延。違限在半年以上者。得官日罰俸六月。一年以上者。得官日罰俸一年。如果有患病及風水阻滯等情。取具該地方官印結送部。免

其查議。○二十五年奏准官員承審案件。准其於本限內扣除公出日期。其餘承緝等案。均不准扣除公出日期。○又奏准營衛裁缺復職降調初授等官。起文赴部。如無故違限。照候補候選人員議處。○二十七年奏准武職官員赴任。違限至三月以內。果係中途患病。呈明該地方官驗實具報督撫。先行咨明任所。俟病痊日給予印結。載明起程日期咨報部科。或係風水阻滯。一面給予印結。一面詳報督撫轉咨任所。均於咨繳劄票文內。逐細聲明查覈。如違限在三

月以外。卽有確實文結。止准扣除三月之限。其餘仍按違限月日。分別查議。或有報明患病。至三月以上不痊者。該處地方官卽親往詳加驗看。出具確實印結。申報該省督撫。分別題咨開缺。准其回籍調理。病痊之日。照告病官員例查辦。儻有心遲逾。捏稱中途患病等情。一經查出。將本員不准扣除病限外。逾限三月以上者。降二級調用。四月以上者。降三級調用。五月以上者。革職。如遲至三月以上。捏稱風水阻滯。亦照捏稱患病違限三月以上之例。一體查叅議處。

其率行通同出結之地方官均照徇情給結例
降二級調用轉詳官罰俸一年至現任武職推
升題升甄別保送保留卓異薦舉各員赴部引
見均照此例查議○三十年奏准漢侍衛回京逾限
至年滿應升之時如逾限四月者停升一年逾
限八月者停升二年逾限一年者停升三年○
三十一年奏准在京官員無論初任補任總以
奉

旨之日起定限十日內到任該衙門即於五日內咨
部如無故到任逾限將本官罰俸三月若已經

到任該衙門不能按限咨部。即將承辦之員逾限一日至十日者。罰俸一月。十日以上者。罰俸三月。此內僅有患病及別項事故。不及限內到任。取具同鄉官印結。以憑查覈。○三十二年奏准。嗣後凡一切應行送部之題補。豫保。卓異。推升各員。并該督撫於接准部覆之日。即照

欽部事件之例。限四月給咨送部。兼管二省之總督。所管隔省人員。限六月給咨送部。如逾限不行送部。將該督撫照遲延例議處。其有承辦要差不能依限赴部者。該督撫先行聲明報部。俟差

竣之日。即行赴部。○三十三年題准。督撫提鎮於武職官員及民人一切呈請案件。俱以呈報之日為始。定限三月分別咨題完結。並將具呈月日聲明。以憑查覈。如有逾限。即照

欽部事件遲延例議處。儻原呈內實有舛錯遺漏。應較查者。俱於案內將初次呈報及批駁換詳月日。摘取簡明情由聲敘。如有毛舉細疵。故為駁飭。並捏改月日者。除按遲延日期照例議處外。係故為駁飭。罰俸六月。係捏改月日。罰俸九月。○又奏准。巡捕營官員議處案件。有由部查取

職名者。步軍統領衙門扣限於五日內咨送。○
又議准。行查外省公文。即將限何日到省之處。
於封面上註明。該省咨覆到部公文。亦將限何
日到京之處。於封面上註明。各該衙門接到公
文時。按日覈對。直隸限四日。山東限九日。河東
河道總督限十一日。山西限十二日。河南奉天
限十五日。漕運總督。江南河道總督限二十日。
江甯限二十三日。安徽。陝西限二十五日。江蘇
限二十七日。湖北限二十八日。浙江限三十日。
江西限三十二日。湖南限三十七日。陝西限四

十一日。四川福建限四十八日。貴州限四十九日。廣西限五十五日。廣東限五十六日。雲南限六十日。如有逾違。查係何處遲延。即將該管官照例議處。其各省督撫提鎮等衙門。除自行參奏案件。即將職名附列疏內送部。毋庸起限外。其由部查取職名者。該省查辦。雖由所屬兩司副將參將等官覈轉。總以接奉部咨之日為始。定限十日出文咨送。如有必須行查所屬者。即按轉查程。途月日若干。逐一扣明咨部覈定。兵部即將何日咨行。何日覆到。敘入本內。如有逾

違查明遲延緣由。照事件遲延例分別議處。○
三十七年奏准嗣後一切承追案件。該督撫一
面督屬嚴追。一面查明該員歷過任所。分咨各
省嚴查有無隱寄。照例辦理。毋庸俟本籍無追
始行咨查。任所其任所地方。自文到日起。勒限
三月。據實查明。申詳該督撫咨明原籍辦理。並
令該督撫嚴加督催。如有逾違。即照

欽部事件遲延例議處。○三十九年奏准嗣後六法
人員。如有情願赴部者。自部覆文到之日起。定
限六月。即在原任省分呈請給咨赴部引

見如過限期毋庸送部。○四十一年奏准推升武職
統照文職給憑之例於奉

旨後十日內即將限票封發各該督撫俟該員交代
清楚領票之日起亦限十日內嚴催照限令其
赴任其有應需交代營務日期仍令督撫隨咨
聲明准其扣展並將起程日期報部存案如該
督撫不於限內將限票給發者照

欽部事件遲延例分別議處所遲月日准該員於原
限內扣算加展以昭平允。○四十四年題准嗣
後承督各官遇有赴部及差派出省並本省緊

要事件。在其隨本聲明。將公出各日期扣除計算。如借名調考調署別缺。以圖規避者。除不准扣除外。仍將濫委之上司一併議處。又題准官員開報本身應議職名。違限不及十日者免議。十日以上者。罰俸六月。一月以上。罰俸一年。三月以上。降一級留任。半年以上。降二級留任。一年以上。降二級調用。如有心延挨者。查明屬實。照規避例革職。如並非本身職名。開報違限不及十日者。免議。十日以上。罰俸三月。一月以上。罰俸六月。三月以上。罰俸一年。半年以上。降

一級留任一年以上。降二級留任。○四十六年諭開復加級之案。係朕特恩。各該督撫提鎮等何以遲至年餘尚有未經咨部者。該部酌限六箇月造報。為期尚寬。嗣後此等事。著定限奉文三箇月內查明報部。如逾限不行咨部者。該部即予銷除。欽此。遵

旨議定。嗣後武職辦差。欽奉

恩旨加級。並開復任內降罰事故。於文到日為始。定限三箇月內查明造冊報部覈辦。如逾限不行咨報。即將該營造冊遲延之員銷除。其辦差人員仍照例議處。其查辦遲延之總督巡撫提督

總兵。概予銷除。仍照

欽部事件。遲延月日。分別議以罰俸。至造送辦差議。敘職名冊籍。遲延官員。如係辦差。應行議敘者。即將該員應敘之處查銷。若並未辦差。不在議敘之列者。仍按其遲延月日。分別議處。○四十八年。奏准武職官員。造具交代冊結。逾限十日以上者。罰俸三月。一月以上。罰俸六月。三月以上。罰俸一年。半年以上。降一級留任。上司督催不力。遲延三月以上者。罰俸六月。半年以上。罰俸九月。若已申報上司。該管上司不即轉報。或

於升任官劄票已到。不即委官署理者。各罰俸一年。○四十九年奏准營衛升任官員劄票到日。該督撫提鎮委員署理陝西甘肅二省督撫提鎮標下中營。俱限四十日交代明白。雲南督標提標臨元等六鎮。以及貴州提標安義等四鎮。俱限五十日交代明白。其餘各標協營。並江蘇安徽江西山東直隸山西河南浙江福建四川湖南湖北廣東廣西十四省。俱限一月內交代明白。准其離任。至暫行委署之員。不及三月者。毋庸交代。統歸後任併案結報。以歸簡便。○

又奏准。屬員開報遲延。例應議處。該管上司不行揭報。經督撫提鎮以徇庇題參者。降二級調用。○五十年覆准。回任各員到任後。令該督撫等將有無違限之處。一體咨會兵科。以便查覈。○五十七年奏准。營衛各員造送關繫錢糧冊結。遲延違限不及一月者。罰俸六月。一月以上。罰俸一年。三月以上。降一級留任。六月以上。降二級留任。一年以上。降二級調用。如造送非關錢糧冊結。遲延違限不及一月者。罰俸三月。一月以上。罰俸六月。三月以上。罰俸一年。六月以

上降一級留任一年以上。降二級留任。如冊結已經申送而提鎮不即申轉以致遲延者。照造冊官例酌減議處。○五十九年奏准各省督撫於部院咨取事件。以文到日為始。扣除往返程途。限二十日內出咨。如必須輾轉行查。以及行款過多。應行造冊者。限一月咨覆。如有遲延。按違限月日。分別議處。○嘉慶四年奏准屬員開報職名遲延。督催不力之上司。除違限十日以上者免其處分外。至一月以上者。罰俸三月。三月以上。罰俸六月。半年以上。罰俸九月。一年以

上。罰俸一年。○五年議准。各省遇有巡船遭風之案。巡洋員弁。迅速呈報督撫。如遲延一月以上。降一級留任。三月以上。降一級調用。六月以上。降二級調用。九月以上。降三級調用。一年以上。革職。至督撫一聞稟報。即速差員覆勘明確。出具保結題請修補。其具題日期。以半年為限。如於半年之外。遲延三月以上。罰俸一年。六月以上。降一級留任。一年以上。降一級調用。二年以上。降二級調用。其有無遲延。均於具題本內先行聲明。如有遲延。按其年月。會同吏部照例。

議處。○六年奏准官員任內有承督之案。僅將初叅開送。其展叅職名不行開叅。或將二叅三叅開送。其四叅職名又不開叅者。其漏報展叅職名各官。照遺漏不報例。罰俸一年。○又奏准武職官員赴任違限。統由兵科題叅。移會兵部議處。其違限不及三月者。兵科將應否寬免之處。聲明請

旨。至揀發人員赴省繳照。有違限者。照赴任違限例。查辦。○又奏准在京漢官回籍。問有罪名者。限一月起程。外任漢官革職離任。交代完日。即行

起程不得過四月之限。至巡捕營並外省地方專汛各官。不於限內催令起程。如容留一官及伊家口在地方潛住三月以上。降一級留任。兼轄統轄官罰俸一年。提督總兵罰俸六月。半年以上。專汛官降一級調用。兼轄統轄官降一級留任。提督總兵罰俸一年。一年以上。專汛官降二級調用。兼轄統轄官降一級調用。提督總兵罰俸二年。至回籍人員。如有患病難行。及中途阻滯逗遛等情。該地方官查明報部查覈。其解任休致給假等官回籍。聽其自便。

從改外任漢官革職回籍。

在地方潛任半年以上專汎官降一級留任兼
轄統轄官罰俸一年提督總兵官罰俸六月一
年以上專汎官降一級調用兼轄統轄
官降一級留任提督總兵官罰俸一年○又奏
准綠營武職官員緣事降調奉

旨由該督撫出具考語送部引

見者暫停開缺俟該員到京帶領引

見請

旨分別去留該督撫於接奉部文之日即委員署理
飭令交代清楚勒限三月赴省領咨赴部不准
藉詞稽延該督撫將該員赴省請咨日期於文
內聲明報部辦理如違限一月以上將該員罰

俸一年。三月以上。降一級留任。半年以上。降二級留任。一年以上。停其送部。即照原議。實降實革。具題。如督撫提鎮。不飭催依限領咨。或該員赴省請咨。不即給發。以致遲延。半年以上者。將督撫提鎮罰俸一年。一年以上。降一級留任。其年老保題留任人員。例應送部帶領引。

見分別去留者。亦照此例辦理。

後改降調革職送部引見人員。違限

一月以上者免議。三月以上者罰。○七年

諭。嗣後軍營逃兵。著展限三箇月報部一次。以歸覈實。

○八年

諭。兵部具題富僧德富翰等軍功議敘一本。已依議行矣。此案富僧德富翰等因趕勦樊曾股匪。打仗勇往。交部議敘。係上年六月之事。乃該部遲延一年之久。始行具題。延緩已極。雖經聲明奉旨。後行查該員等旗分實缺營制。於本年五月始據參贊成都將軍德楞泰咨明辦理。但富僧德富翰二員。均係侍衛。上年降旨議敘時。該部何以不就近自侍衛處咨查。轉欲行查外省。以致輾轉稽延。實屬拘泥。至外省奉到部文後。自應即速查明。早為咨覆。何以直至本年五月始據覆到。此外尚有行查之協領明德等六員。至今

並未查覆。亦屬因循怠玩。均著傳旨申飭。其未經查覆各員。仍著該部速行咨催辦理。近來內而部院各衙門外。而督撫司道所辦之事。延緩怠弛者多。急公任事者少。朕深以為愧。若再不加振作。力矯頹風。朕惟執法嚴懲。毋謂教之不豫也。○十二年議定官員造冊舛錯遲延。文職例載按三月內外分別議處。武職事同一律。應行仿照。凡營衛武職造送各項冊結。因有舛錯遺漏。經該管上司駁查更正。遲延在三月以內者。照造冊舛錯例議處。其因舛錯遺漏。以致遲延三月以外者。仍照造冊

遲延例議處。○十五年議定。凡官員造報各項錢糧文冊。因舛錯以致遲延。除初次往返程途。並各上司查覈日期。均准其扣除外。其有屢經駁飭。遵照更正者。皆由該員不能悉心覈對。以致輾轉稽遲。所有再次駁查以後。往返程途。月日。並各上司查覈日期。概不准其扣除。仍按其違限月日。分別議處。至該管各官。亦不得故意駁飭。如違將該管官罰俸六月。兼轄上司罰俸三月。○十七年奏准。凡官員製造緊急軍器。不依限速完。遲誤者。革職督製官降三級調用。總

督巡撫提督總兵降三級留任。若修製尋常操演及換防需用各軍械。如有貽誤。承修承製官。逾違不及一月者。免其議處。一月以上者。罰俸六月。兩月以上者。罰俸一年。三月以上者。罰俸二年。四月以上者。降一級留任。五月以上者。降一級調用。督修督製之員。逾限一月以上者。罰俸三月。兩月以上者。罰俸六月。三月以上者。罰俸一年。四月以上者。罰俸二年。五月以上者。降一級留任。總督巡撫提督總兵。逾限一月以上者。免議。兩月以上者。罰俸三月。三月以上者。罰

俸六月。四月以上者。罰俸九月。五月以上者。罰俸一年。如承修承製之員。玩視軍儲。將應領之帑。延挨請領者。按其違限月日。照修製逾限例。分別議處。儻該上司故意勒指。以致遲誤者。將該上司降二級調用。承修承製官免議。○道光三年

諭。向來衛所各員弁。五年俸滿後。每屆三年甄別一次。分別去留。如有遲延。按照月日議處。定例甚嚴。茲據兵部查明衛千總劉權本等六員。自到任後至今。俱未咨報俸滿。並逾甄別例限。捐升衛守備。未經離任。

之千總田治邦等六員。議敘儘先升用之千總楊壽春等二員。均係不計俸滿仍應甄別之員。亦未按次報部。節經該部查催。僅據開報初次甄別。又未將千總張景魁等二員考驗咨報。顯違成例。任令該員弁等遲逾至十餘年及二十餘年之久。戀缺規避情弊。在所不免。不可不嚴行查辦。著交魏元煜即將該衛千總等從前因何並不按次呈報之處。詳細確查。據實具奏。其歷任辦理遲延之漕運總督。並著查取職名交部議處。○九年奏准。衛千總歷俸月日。及俸滿後三年甄別。均由漕運總督衙門扣算年限。勒

限三月考驗給咨。並將給咨日期。先行咨報部科。以憑稽覈。儻該弁等託故耽延。即行革職。其非託故耽延者。仍照遲延本例議處。如漕運總督辦理遲延。交吏部議處。○又奏准八旗外任綠營職官。因裁缺另補。或緣事降革。休致及丁憂事故。應行歸旗者。任內並無未清事件。離任之後。無論前任文職武職。統限六月。由該管上司催令起程回旗。照各省程途遠近定限。大路有驛站者。日行一站。僻路無驛站者。日行五十里。其由水路行者。即於起程之先呈明。由某省

水路仍按照原定限期計算。到京俱咨報部旗查覈。若限滿不即起程。及起程而中途逗遛。或不行進京。而在他處居住。違限在三月以上者。有職者降一級調用。半年以上者。降二級調用。已革職者。照閒散告假之例辦理。如實因患病。或任內有未清事件。該督撫查明確實。咨報部旗。准其展限三月。如限滿病尚未愈。及事件未清。准其再行展限。僅展限滿後不即起程。亦照前例辦理。至起程後行至中途患病。及因風水阻滯。取具地方官印結。報明部旗。其應展例限。

及違限處分。亦照此例辦理。○十年

諭前因御史劉光三奏參直隸省於奉旨勒限嚴緝盜案。含混延閣。降旨令吏兵二部將各省參限已逾之案。一併查參。茲據各該部查明具奏。並將屢催未覆各案開單呈覽。各省員弁承緝案件。關繫緊要。內有奉持旨勒限嚴緝者。該管上司於限滿時。尤應遵照辦理。乃往往任意遷延。逾限不行題參。及由該部查取應議職名。經年累月。並不咨覆。甚至避重就輕。分案開參。現在未覆各案。據吏部查明至七百二十三件。兵部查明至二百五十四件之多。似此有心延玩。

屢催固應。顯係為屬員規避處分地步。相率因循。日積日多。尚復成何政體。嗣後除尋常承緝咨案。仍照舊辦理外。其奉特旨勒限嚴緝。限滿無獲。該管上司不行叅奏。該部即查明將該督撫照例嚴叅。所有該二部現在查出各案。並著勒限咨覆。將開報遲延在任各員。及歷任不行飭催之督撫。各按在任月日。開送咨部。一併議處。○十二年奏准。各省分發營衛武進士。並漢人駐防各武舉。赴部呈請分發時。各取具同鄉京官印結。並本旗圖結。分別道路遠近。照武職憑限日期。給予定限驗票投標。如有

無故不到。任意逗遛者。該督撫查明逾限日期。咨部存案。儻逾限在六月以上。即將隨營之處註銷。○咸豐六年

諭載齡奏差派並告假赴京各員。請嚴定逗遛處分等語。

各陵差派並告假赴京各員。自應如期銷差。茲據該總兵查明在京逗遛各員。竟有二十餘人之多。實屬不成事體。著各該衙門查照單開各員名。迅速催令銷差回任。以重職守。嗣後因差及告假各員。如有在京逗遛者。著該部明定逾限處分。即由守護

陵寢大臣會同該總兵查明參奏。○八年奏准武職員
弁奉該管上司調遣有緊要事件任意耽延者
降一級調用。○同治元年

諭兵部奏請飭各省督撫及各路領兵大臣按期具報
兵勇數目一摺各省兵額例於年終題報到部豈得
藉詞軍務未平延不造報任令提鎮協營互相徇隱
現據該部奏稱除湖北四川兩省依限題到外其餘
各省均未依限造報實屬疲玩已極嗣後各省督撫
務須痛除積習將存營出師各兵數數實稽察按限
造報儻再任意遲逾即由該部奏參將該督撫及各

營員從嚴議處。以儆玩泄。其各路軍營徵調兵勇。及添裁數目。糧臺文案。既有冊載可稽。何難隨時報部備查。嗣後各路統兵大臣。著於此次奉旨之日起。限三箇月內。將現存兵勇名數。並管帶員名。征防處所。一併分析報部。此後隨時有無增減。均照按限三箇月咨報一次。如敢視為具文。延玩不報。即著該部查明嚴參。請旨辦理。以杜浮銷。而除隔閡。並著各省督撫。及各路統兵大臣。另備詳細冊籍一分。按限送報軍機處。以備查覈。毋許藉詞稽延。○光緒十二年奏准。衛所等官承辦報銷未完分數文冊。照戶部

奏定限期。依限造報。違限不及一月者。罰俸六月。違限一月以上者。罰俸一年。違限三月以上者。降一級留任。違限六月以上者。降二級留任。違限一年以上者。降二級調用。如冊報已經申送。而糧道不即轉送。以致奏報遲延者。該衛所官免議。將不即轉送之糧道及奏報遲延之漕運總督交吏部分別議處。